

LÖG
KJÖRDÆMISRÁÐS SJÁLFSTÆÐISFLOKKSINS
Í SUÐURKJÖRDÆMI

Kjördæmisráð

1. grein

Sjálfstæðisfélögin og fulltrúaráð sjálfstæðisfélaganna í Suðurkjördæmi mynda með sér sameiginlegt ráð, er nefnist Kjördæmisráð Sjálfstæðisflokksins í Suðurkjördæmi.

2. grein

Hlutverk kjördæmisráðs er að fara með sameiginleg flokksmál í kjördæminu í umboði miðstjórnar.

Skipan kjördæmisráðs

3. grein

- a) Fulltrúaráð sjálfstæðisfélaganna kjósa hvert um sig fulltrúa í kjördæmisráð, einn fulltrúa fyrir hverja 10 fulltrúaráðsmeðlimi eða brot úr þeirri tölu, sbr. 27. gr. skipulagsreglna Sjálfstæðisflokksins.
- b) Að auki kjósa félögin í kjördæmisráð sem svarar einum fulltrúa fyrir hverja 50 fullgilda félagsmenn sjálfstæðisfélaga í umdæminu eða helmingabrot þeirrar tölu eða meira, í réttu hlutfalli við fjölda fullgildra félagsmanna við síðustu áramót þar á undan. Þó skal félag, sem ekki nær þessari tölu hafa rétt til að kjósa einn fulltrúa í kjördæmisráð. Stjórn fulltrúaráðs skiptir fulltrúum milli félaganna eftir þessari reglu. Vilji félögin ekki una þeirri skiptingu, geta þau lagt ágreininginn undir úrskurð almenns fundar í fulltrúaráðinu, en síðar má skjóta málinu til kjördæmisráðs, sem hefur endanlegt úrskurðarvald.
- c) Formenn fulltrúaráða, kjörnir þingmenn flokksins í kjördæminu, kjörnir aðalmenn í sveitarstjórnnum fyrir Sjálfstæðisflokkinn í kjördæminu og formenn kjördæmissamtaka sérsambanda í kjördæminu skv. 63. gr. skipulagsreglna og stjórnarmenn í stjórn kjördæmisráðs eru sjálfkjörnir í kjördæmisráð.
- d) Frambjóðendur í aðalsætum á lista Sjálfstæðisflokksins í kjördæminu við hverjar alþingiskosningar, aðrir en kjörnir alþingismenn, skulu hafa rétt til fundarsetu á fundum kjördæmisráðs, með málfrelsi og tillögurétti, en hafa þar ekki atkvæðisrétt nema þeir séu kjörnir fulltrúar. Sama á við flokksráðsmenn í kjördæminu.

4. grein

Fulltrúar í kjördæmisráði skulu kosnir árlega á aðalfundum fulltrúaráða og sjálfstæðisfélaga. Umboð kjördæmisráðsfulltrúa gilda frá aðalfundi viðkomandi fulltrúaráðs eða sjálfstæðisfélags til næsta aðalfundar þess. Þrátt fyrir ákvæði í 1. mgr. falla umboð kjördæmisráðsfulltrúa úr gildi ef meira en átján mánuðir eru liðnir frá því þeir voru kosnir, miðað við fundardag kjördæmisráðs.

Stjórn kjördæmisráðs og verkefni hennar

5. grein

Stjórn kjördæmisráðs skal skipuð 15 mönnum. Skal formaður kosinn sérstaklega. Formaður kjördæmissamtaka ungra sjálfstæðismanna í Suðurkjördæmi er sjálfkjörinn í stjórnina.

6. grein

Stjórn kjördæmisráðs skal:

- a) Annast framkvæmdastjórn kjördæmisráðs.

- b) Sjá um að flokksstarfið í kjördæminu sé í samræmi við skipulagsreglur flokksins.
- c) Fylgjast með því að fulltrúaráðin og sjálfstæðisfélögin kjósi reglulega fulltrúa í kjördæmisráð.
- d) Hafa vörslu sjóðs kjördæmisráðs og annarra sameiginlegra eigna flokksins í kjördæminu.

7. grein

Árgjald sem ákveðið er á aðalfundi skal greitt í sjóð kjördæmisráðs fyrir hvern fullgildan félagsmann í sjálfstæðisfélögum þeim, sem standa að kjördæmisráðinu.

8. grein

Stjórn kjördæmisráðs hefur heimild til að skipa þær starfsnefndir fyrir kjördæmisráð, sem þörf krefur á hverjum tíma, s.s. skipulagsnefnd, fjármálanefnd, útgáfu- og upplýsinganefnd eða aðrar nefndir

Kjörnefnd vegna alþingiskosninga

9. grein

Í kjörnefnd eru sjálfkjörnir: Formaður kjördæmisráðs og formenn fulltrúaráða sjálfstæðisfélaganna í kjördæminu, en í forföllum þeirra varaformaður kjördæmisráðs og varaformenn fulltrúaráðanna. Kjörnefnd kýs sér formann.

Á fundi kjördæmisráðs, sem stjórn þess boðar til með öruggum hætti og að minnsta kosti viku fyrirvara, skal kjósa fulltrúa í kjörnefndina, einum fleiri en tala hinna sjálfkjörnu fulltrúa er hverju sinni. Jafnframt skal kjósa þrjá varamenn er taki sæti kjörinna aðalmanna í forföllum þeirra.

Kjörnefnd gerir tillögur til kjördæmisráðs um framboðslista flokksins við kosningar til Alþingis.

10. grein

Kjördæmisráð ákveður framboðslista flokksins við kosningar til Alþingis. Þegar ákveða skal framboð, skal til þess fundar boðað á þann hátt, að allir ráðsmenn fái örugglega vitneskju um fundinn og dagskrá hans með minnst viku fyrirvara. Til þess að listi sé lögmætur, þarf meirihluti atkvæðisbærra fundarmanna að samþykkja hann. Skylda er að hafa leynilega atkvæðagreiðslu, ef þess er óskað.

Stjórn kjördæmisráðs skal leita staðfestingar miðstjórnar á framboðslistum í samræmi við 54. grein skipulagsreglna Sjálfstæðisflokksins.

11. grein

Þegar framboðslisti flokksins til alþingiskosninga hefur verið ákveðinn, skal stjórn kjördæmisráðs, ásamt formönnum fulltrúaráðanna og frambjóðendum í aðalsætum á lista flokksins, mynda kosningastjórn, sem sameiginlega stjórnar og ber ábyrgð á kosningunum. Kosningastjórn ræður eða skipar síðan 3 menn í framkvæmdastjórn.

Prófkjör

12. grein

Ákveði kjördæmisráð að viðhafa prófkjör við val á frambjóðendum til alþingiskosninga skal það fara fram í samræmi við samræmdar framkvæmdareglur miðstjórnar Sjálfstæðisflokksins sbr. 57. grein skipulagsreglna Sjálfstæðisflokksins.

Aðalfundur kjördæmisráðsins

13. grein

Aðalfundur kjördæmisráðs skal haldinn ár hvert og eigi síðar en fyrir lok októbermánaðar. Fundinn skal boða öllum aðildarfélögum með minnst 3ja vikna fyrirvara. Stjórn kjördæmisráðs boðar til aðalfundar og ákveður fundarstað og tíma og gildir hið sama um aðra fundi kjördæmisráðs.

14. grein

Á aðalfundi kjördæmisráðs skal starfa uppstillingarnefnd, er gerir tillögur um kosningu stjórnar, kjörnefndar og fulltrúa í flokksráð og skal hún skal skipuð formönnum fulltrúaráðanna. Formaður kjördæmisráðs boðar nefndina til fyrsta fundar, en nefndin kýs sér formann.

15. grein

Á aðalfundi kjördæmisráðs skal eftirtalið tekið fyrir:

- a) Skýrsla fráfarandi stjórnar og reikningar kjördæmisráðsins.
- b) Lagabreytingar.
- c) Ákvörðun árgjalds.
- d) Stjórnarkjör.
 - a. Kosning formanns.
 - b. Kosning 13 stjórnarmanna.
- e) Kosning fulltrúa í flokksráð skv. 13.gr. skipulagsreglna Sjálfstæðisflokksins.
- f) Kosning þriggja fulltrúa í miðstjórn og þriggja til vara skv. 23. grein skipulagsreglna. Kosningar til miðstjórnar skulu vera bundnar við skriflegar tillögur. Framkvæmd kosninganna annast uppstillingarnefnd sem skipuð er skv. 14. gr. laga þessara.
- g) Kosning tveggja skoðunarmanna reikninga og eins til vara.
- h) Önnur mál.

16. grein

Lögum þessum má aðeins breyta á aðalfundi og þarf 2/3 hluta atkvæða allra atkvæðisbærra fundarmanna til að breytingin nái fram að ganga.

17. grein

Nú óska a.m.k. 20 kjördæmisráðsmenn skriflega eftir því við stjórn kjördæmisráðs að fundur verði haldinn í ráðinu um tiltekið mál og skal stjórnin þá verða við þessari ósk eigi síðar en 14 dögum eftir að henni barst hin skriflega ósk um fund. Þessi fundur er ekki ályktunarfær nema helmingur kjördæmisráðsmanna sé mættur.

18. grein

Lög þessi öðlast þegar gildi.

Þannig samþykkt á stofnfundi kjördæmisráðs Suðurkjördæmis, í Eldborg við Svartsengi 11. nóvember 2000.

Þannig samþykkt á aðalfundi kjördæmisráðs Sjálfstæðisflokksins í Suðurkjördæmi, í Þorlákshöfn 23. nóvember 2002.

Þannig samþykkt á aðalfundi kjördæmisráðs Sjálfstæðisflokksins í Suðurkjördæmi, á Leirubakka í Landssveit 22. nóvember 2008.

Þannig samþykkt á aðalfundi kjördæmisráðs Sjálfstæðisflokksins í Suðurkjördæmi, á Kirkjubæjarklaustri 25. maí 2019.